

四庫全書

集部

欽定四庫全書

石倉歷代詩選卷一百三十

明 曹學佺 編

宋詩七

范仲淹

謝黃惣太博見示文集

松桂有嘉色不與衆芳期金石有正聲詎將羣響隨君
子著雅言以道不以時仰止江夏公大醇無小疵孜孜

經緯心落落教化辭上有帝皇道下有人臣規邈與聖
賢會豈以富貴移誰言荆棘滋獨此生蘭芝誰言鼃黽
繁獨此蟠龍龜豈徒一時異將為千古奇願言周召風
達我堯舜知致之諷諫路陞之誥命司二雅正得失五
典陳雍熙頌聲格九廟王澤及四夷自然天下文不復
迷宗師

農

聖人作耒耜蒼蒼民乃粒國俗儉且淳人足而家給九

載襄陵禍比戶猶安輯何人變清風驕奢日相襲制度
非唐虞賦斂由呼吸傷哉田舍人常悲大絃急一夫畊
幾壠遊墮如雲集一蠶吐幾絲羅綺如山入太平不自
存凶荒亦何及神農與后稷有靈應為泣

寄題孫氏碧鮮亭

天地何風流復生王子猷黃金買碧鮮綠玉排清秋非
木亦非草東君歲寒寶耿耿金石性雪霜不能老清風
乃故人徘徊過此君泠泠釣天音千載猶得聞應是聖

賢魄鍾為此標格高節見直清靈心隱虛白粉筠多體
貌錦籜見兒童上交松桂枝下結蘭蕙叢秀氣藹晴嵐
翠光疑綠水明月白露中靜如隱君子不願湘靈泣不
求伶倫吹鳳凰得未晚蛟龍起何時蕭蕭雲水間良與
主人宜紅塵滿浮世何當拂長袂坐嘯此亭中行歌此
亭際逍遙復逍遙不知千萬歲

明月謠

明月在天西初如玉鈎微一夕增一分堂堂有餘輝不

掩五星耀不礙浮雲飛徘徊河漢間秀色若可飡清風
起叢桂白露生堦蘭高樓望君時為君拂金徽奏以堯
舜音此音天與稀明月或可聞顧我亦依依月有萬古
光人須萬古心此心良可歌憑月為知音

清風謠

清風何處來先此高高臺蘭叢國香起桂枝天籟迴飄
飄度清漢浮雲安在哉萬古鬱結心一旦為君開有客
慰所思臨風久徘徊神若遊華胥身疑立天台極渴飲

沆瀣大暑執瓊瓌曠如攜松丘騰上烟霞遊熙如即莊
老語入逍遙道朱絃鼓其薰可以解吾民滄浪比其清
可以濯吾纓願此陽春時勿使飄暴生千靈無結慍萬
卉不摧榮庶幾宋玉賦聊廣楚王情

馴鷗詠

萬物有常性性無不貴生鳳翔與駿奔一一遠害情歟
彼沙上鷗皎皎霜雪明月宿滄洲靜日浴滄浪清何以
狎溪人溪人澹無營循循自飲啄往往相逢迎徘徊兩

無猜何慕復何驚客有懷依依雲水言將歸
逐爾羣鷗樂羣鷗爾勿飛此心未忘者天機
非殺機

公路澗

曹公與袁紹
常爭據此地

嵩高發靈源北望洛陽注清流引河漢白氣橫雲霧英
雄惜此地百萬曾相距近代無戰爭常人自來去

拜馬澗

子晉登仙遺馬于
此鄉人見之皆拜

傳聞王子晉澗邊遺一驥當時青雲路雞犬亦可致未
必真龍媒悠悠在平地

二室道

太室何森聳少室欲飛動相對起雲霞恍如遊仙夢何
以寵此行行歌降神頌

天門泉

天門有靈泉塵埃未嘗至日月自高照雲霞亦輝庇惟
抱夷齊心飲之可無愧

峻極上寺

徘徊峻極寺清意滿烟霞好風從天來吹落桂樹花高

高人物外猶屬楚王家

中峰

嵩高最高處逸客偶登臨
迴看日月影正得天地心
念此非常遊千載一披襟

聽真人琴歌

銀潢耿耿霜稜稜西軒月色寒如冰
上人一叩朱絲繩萬籟不起秋光凝
伏羲歸天忽千古我聞遺音淚如雨
嗟嗟不及鄭衛兒北里南鄰競歌舞
競歌舞何時休師

襄堂上心悠悠擊浮金戛鳴玉老龍秋啼滄海底幼猿
暮嘯寒山曲隴頭瑟瑟咽流泉洞庭蕭蕭落寒木此聲
感物何太靈十二銜珠下仙鵲為余再奏南風詩神人
和暢舜無為為余試彈廣陵散鬼物悲哀晉方亂乃知
聖人情慮深將調四海先調琴興亡哀樂不我遁坐中
可見天下心

湖山

湖山滿清氣賞心甲吳越晴嵐起片雲晚水連初月漁

父得意歸歌詩等閒發

筠亭

為愛碧鮮亭入夏
姁姁至臺榭競生烟
獨有清涼意高
岡鳳不來幽人此沈醉

風笛

風引湖邊笛焉知非隱淪
一聲裂雲去明月生精神
無為落梅調留寄隴頭人

渚蓮

武陵誰家子波面雙雙渡空積心中絲未成機上素似
共織女期秋宵苦霜露

和葛閣寺丞接花歌

江城有卒老且貧憔悴抱關良苦辛衆中忽聞語聲好
知是北來京洛人我試問云何至是欲語汎瀾墮雙淚
斯須收淚始能言生自東都富貴地家有城南錦繡園
少年只以花為事黃金用盡無他能却作瓊林苑中吏
年年中使先春來晚宣口敕修花臺奇芬異卉百餘品

求新換舊爭栽培猶恐君王厭顏色羣芳只似尋常開
幸有神仙接花術更向都城求絕匹梁王苑裏索妍姿
石氏園中搜淑質金刀玉尺裁量妙香膏膩壤彌縫密
迴得東皇造化工五色敷華異平日一朝寵愛歸牡丹
千花相笑妖嬈難竊藥嫦娥新換骨嬋娟不似人間看
太平天子春遊好金明柳色籠黃道道南樓殿五雲高
鈞天捧上蓬萊島四邊桃李不勝春何況花王對玉宸
國色精明動韶景天香旖旎飄芳塵特奏霓裳羽衣曲

千官獻壽羅星辰
兌悅臨軒逾數刻
花吏此時方得色
白銀紅錦滿牙牀
拜賜仗前生羽翼
惟觀風景朝仍暮
一心歲歲供春賦
中途得罪情多端
刻木在前何敢訴
竄來江外知幾年
骨肉無音雁空度
北人情況異南人
瀟灑溪山苦無趣
子規啼處血為花
黃梅熟時雨如霧
多愁多恨信傷人
今年不及去年身
目昏耳重精力減
復有鄉心難具陳
我聞此語聊悵悵
近曾侍從班中立
朝違日下暮天涯
不學爾曹向隅泣
人生榮辱如浮雲

悠悠天地胡能執賈誼文才動漢家當時不免來長沙
幽求功業開元盛亦作流人過梅嶺我無一事逮古人
謫官却得神仙境自可優優樂名教曾不恹恹弔形影
接花之枝爾則奇江鄉卑濕何能施吾皇又詔還淳朴
組織文章皆棄遺上林將議賜民畋似昔繁華徒爾為
西都尚有名園處我欲抽身希白傳一日天恩放爾歸
相逐栽花洛陽去

天平山白雲泉

靈泉在天半狂波不能侵神蛟穴其中渴虎不敢臨
照涵秋碧泓然一勺深游潤騰雲飛散作三日霖天造
豈無意神化安可尋挹之如醍醐盡得清涼心聞之異
絲竹不含哀樂音月好羣籟息涓涓度前林子晉罷雲
笙伯牙收玉琴徘徊不擬去復發滄浪吟乃云堯湯歲
盈盈長若今萬里江海源千秋松桂陰茲焉如有價北
斗量黃金

留題常熟頂山僧居

平湖數百里隱然一山起中有白龍泉可洗人間耳吾
師仁智心愛茲山水音結茅三十年不道日月深笑我
名未已來問無端理却指嶺邊雲斯焉贈君子

和楊畋孤琴詠

愛此千年器如見古人面欲彈換朱絲明月當秋漢我
願宮商絃相應聲無間自然召南風莫起孤琴歎

絳州園池

絳臺使君府亭閣參園圃一泉西北來羣峰高下覩池

魚或躍金水簾長布雨怪柏鎖蛟虬醜石鬬羆虎羣花
相倚笑垂楊自由舞靜境合通仙清陰不知暑每與風
月期可無詩酒助登臨問民俗依舊陶唐古

晉祠泉

神哉叔虞廟地勝出嘉泉一源甚澄靜數步忽潺湲此
異孰可窮觀者增恭虔錦鱗無敢釣長生同水仙千家
溉禾稻滿目江鄉田我來動所思致主愧前賢大道果
能行時雨宜不愆昏如晉祠下生民無旱年

中元夜百花洲作

南陽太守清狂發未到中秋先賞月
百花洲裏夜忘歸
綠梧無聲露光滑天學碧海吐明珠
寒輝射空星斗疎
西樓下看人間世瑩然都在青玉壺
從來酷暑不可避
今夕涼生豈天意一笛吹銷萬里雲
主人高歌客大醉
客醉起舞逐我歌
弗舞弗歌如老何

送鄖鄉尉黃通

少年好逸驥老者重安車
爭先尚逐逐致遠貴徐徐
勿

言一尉卑千戶繁慘舒外矜固不足內樂則有餘子游
與季路作邑寧款廬五斗對萬鍾所問道何如

依韻和襄陽王源叔龍圖見寄

高車赴南峴敝郊主東道風采喜一見布素情相好屈
指四十秋于今歲寒保我起為君壽善頌復善禱願盡
杯中物薄言理可到君子貴有終功名非必早朝端卿
大夫所尚賢而老世慮久乃周聖門深已造與君誓許
國無忝于祖考潔如鳳食竹樂若魚在藻安得長相親

時時一絕倒不忘平生期
明月滿懷抱

歸雁

稻梁留不得一一起江天
帶雪南離楚和春北入燕
依依前伴侶歷歷舊山川
木葉程猶遠梅花信可傳
子規啼到曉鸚鵡鎖經年
應羨冥冥者東風羽翼偏

寄歐靜秀才

君歸一水遠魂斷木蘭橈
賴有南軒竹清風慰寂寥

野色

非烟亦非霧
羃羃映樓臺
白鳥忽點破
夕陽還照開
肯隨芳草歇
疑逐遠帆來
誰謂山公意
登高醉始迴

酬滕子京同年

謝家風雅若為酬
散吏方耽海上遊
踈懶幾忘傳筆夢
寂寥仍有負薪憂
欲歌蘭雪歸真隱
敢向簪軒競急流
如共茂先瞻氣象
莫言神物在南州

題翠峰院

范蠡舊宅

翠峰高與白雲閒
吾祖曾居水石間
千載家風應未墜

子孫還解愛青山

試筆

偶緣疎拙得天真
豈問前途屈與伸
車馬縱能欺倦客
江山猶可助騷人
懶如叔夜書盈几
狂似淵明酒滿巾
況有南窓姬易在
此心那更起纖塵

送何白節推宰晉原

盛府兼名邑
榮歸指故林
多年望鄉淚
萬里倚門心
江館春寒薄
山程晚翠深
板輿迎侍日
桃李正芳陰

送石曼卿

河光嶽色過秦關，英氣飄飄酒滿顏。
賈誼書成動西漢，謝安人笑起東山。
亨途去覺雲天近，舊隱回思水石間。
此道聖朝如不墜，疏封宜在立譚間。

送韓瀆殿院出守岳陽

仕宦自飄然，君恩豈欲偏。
纔歸劍門道，忽上洞庭船。
墜絮傷春日，春濤廢夜眠。
岳陽樓上月，清賞浩無邊。

遊烏龍山寺

高嵐指天近遠溜出山遲萬事不到處白雲無盡時異
花啼鳥樂靈草隱人知信是棲真地林僧半雪眉

江干閒望

江干日清曠寓目一櫺筇落葉信流水歸雲識舊峰蘭
蓀誰共采鳬雁自相從莫愛蘋風起波來千萬重

桐廬郡齋書事

千峰秀處白雲驕吏隱雲邊豈待招數仞堂高誰富貴
一枝巢隱自逍遙杯中好物閒宜進林下幽人靜可邀

莫道官清無歲計滿山芝朮長靈苗

洞庭山

吳山無此秀乘暇一遊之萬頃湖光裏千家橘熟時平
看月上早遠覺鳥歸遲近古誰真賞白雲應得知

虎丘山

昔見虎耽耽今為佛子巖雲寒不出寺劍靜未離潭幽
步蘿垂徑高禪雪閉庵吳都十萬戶烟瓦亘西南

應制賞花釣魚

萬彙嘉亨日，皇心豫宴辰。
華林新濯雨，靈沼正涵春。
帝幄紛仙籙，天鈎擲錦鱗。
洋洋頒睿唱，賡頌浹簪紳。

過餘杭白塔寺

登臨江上寺，遷客特依依。
遠水欲無際，孤舟曾未歸。
亂峰藏好處，幽鷺得閒飛。
多少天真趣，遙心結翠微。

芝山寺

樓殿冠崔嵬，靈芝安在哉。
雲飛過江去，花落入城來。
得食鷄朝聚，聞經虎夜回。
偶臨西閣望，五老夕陽開。

遊廬山作

五老閒遊倚舳艫，碧梯嵐逕好程途。
雲開瀑影千門掛，雨過松黃十里鋪。
客愛往來何所得，僧言榮辱此間無。
從今愈識逍遙旨，一聽升沈造化鑪。

依韻和延安龐龍圖柳湖

種柳穿湖後，延安盛可遊。
遠懷忘澤國，真賞即瀛洲。
江景來秦塞，風情屬庾樓。
劉琨增坐嘯，王粲乍銷憂。
秀發千絲墮，光搖匹練柔。
雙雙翔乳燕，兩兩睡馴鷗。
折翠贈

歸客濯清招隱流宴回銀燭夜吟度玉關秋勝處千場
醉勞生萬事浮王公多雅致思發共仙舟

和延安龐龍圖寄岳陽滕同年

優游滕太守郡枕洞庭邊幾處雲藏寺千家月在船疎
鴻秋浦外長笛晚樓前旋撥醕頭酒新魚縮項鱖官情
須淡泊詩意定連綿迴是偷安地仍當飽食年只應天
下樂無出日高眠豈信憂邊處胡兵隔一川

依韻酬太傅張相公見贈

出處曾無致主功
南陽為守地猶雄
醉醒往日慙漁父
得失今朝賀塞翁
七里河邊歸帶月
百花洲上嘯生風
卧龍鄉曲多賢達
願預逍遙九老中

知府孫學士見示和終南監宮大保道懷因以

綴篇


玉皇近侍請脩真
賜得南山十里雲
樽有聖賢聊自慰
鼎多龍虎復誰分
謝家山色朝晡見
陶隱松風寤寐聞
萬物已齊無一事
獨醒惟笑醉醺醺

其二

漢陵高興自飄飄何必天台渡石橋
潭上藥靈多餌菊林間詩逸半書蕉
勤歌蘭珮招逋隱懶事塵纓逐宋僚
客有赤松盟約在異時猿鶴不相遼

其三

門外烟嵐紫閣橫九衢風土更何情
籬邊醉傲淵明飲隴上歌隨桀溺耕
三樂放懷千古重萬鍾回首一毫輕
鵬鷁共適逍遙理誰復人間問不平



石倉歷代詩選卷一百三十

欽定四庫全書

集部

石倉歷代詩選卷一百三十一至三

詳校官庶吉士臣范達恩

侍讀臣孫球覆勘

總校官進士臣朱鈐

校對官中書臣方大川

謄錄監生臣馮國柄

欽定四庫全書

石倉歷代詩選卷一百三十一

明 曹學佺 編

宋詩八

范純仁

北遊寄崔象之

塵埃都門路羸馬復北首徘徊孤客心厭此行役久秋
雲結層陰風葉下高柳解鞍止孤館斜雨入戶牖愁懷

寫長川時運付盃酒回念宇宙間無一真我有功名聖
賢事世味俗自厚行心弗愧天安事傳不朽偶為細故
牽還成浪奔走矧庇吾族繁折腰仰五斗營營百年內
此累難遽否田廬倘其完尚可歸老醜人事固莫定此
志誠不苟誦言成短章聊以告吾友

寄謝師直

去夏謁君時踏雨澗川路癯然泣相弔心苦別亦遽窮
愁但匆匆崢嶸歲還暮羈旅念友朋天寒感霜露孤懷

雜離憂紛亂疇可訴計我之官期迨君祥琴御邑館臨
通途車馬當迎還言笑釋所願此喜良可預欲致情抱
勤音書豈能叙

陳東父示及新文

世德鍾良士爽氣橫清秋公才輔經術文價伏時流近
從計廷召暫為梁苑遊京都利名地趨謁先公侯高情
遠俗尚壯麗資冥摅清樽破旅顏黃菊迎歸舟佳藻盈
大軸遺我蠲窮愁正聲和羣心明珠炫雙眸詞高不可

繼惠重終可耐愧君樂善懷行義愚當修

累約舍弟純禮以職事未至

落葉猶同飛寒鳥猶並枝我汝獨何負不得長相隨
偶為細累拘跬步成天涯後日更遠適會合倍難期尚願
家國寧且作千日離悠悠百年間幾別顏即衰從宦非
我志功名徒自欺誰言千寸祿坐使手足違
逐末背本心得一萬已遺爾我粗有識此事良同悲
安得長洲田清水稻百畦將汝入故廬親戚坐成圍
幼弟就文史長

兄近砵盥孝謹奉諸宗祭祀潔四時此外逐風月對酌
白酒卮畢世為善人不負生育慈斯志倘未遂終為路
傍嗤

會師宰

憶昨相逢際風喧洛城春芳菲供愁眼衣袂偕京塵艱
難各之適會合寧逡巡君歸來何時我約赴無因自此
還相望渴臆生埃塵晚歲留故丘山川戚無隣落日送
樵牧蒼烟起荆榛季弟自城至開顏慰天倫遽言長者

車相過止來晨茲遇出意表俟迎屢冠巾寒途馬歷歷
幽扉犬狺狺野夫競走報似得喜佳賓空堂揖顏色和
氣相氤氲開樽共燈燭笑語何諄諄朝遊禹門寺暮歷
清伊濱危龕儼金像遠波舒翠鱗石樓最清絕就宿同
裊茵灘聲夜逾急天然謝韶鈞閒淡盡物理至樂還天
真人生足羈束此會猶難頻所期道義心白首長相親
謁辛化光

濃陰結秋意疎林嘯風聲時節感壯懷挈酒慰友生友

生冰玉士節行映古清十五簪儒冠四十無華纓家貧
道彌富身困譽益榮殷勤數賓侶足趨顏巷輕高齋面
幽圓脩筠擁軒楹班班寒露叢競吐籬下英食具簡且
潔盤蔬亦晶明飲適言笑和至樂不亂情郁然蘭芷芬
薰灼通心誠因嗟朝市間利欲空自兵

歷陽彭衛字明微棄官養母築堂名曰壽燕取
壽老燕安之義得古人養志之道作詩以紀
實

養親不擇祿昔有仕為貧惟云席先疇足以供昏晨超
然舍祿位一志親耕耘既無王事監亦免費用勤雞豚
畜以時梁稻盈倉困處身但清約甘旨極鮮珍堂上垂
素髮含飴弄兒孫綵服不離膝終日常欣欣園中復構
室花竹圍四隣窗戶儼羅列開闔隨寒溫慈顏縱遊適
日涉不為頻雅常壽燕名安康保靈椿門多長者車間
可延嘉賓講道資朋友德譽日以新孝誠動金石豈獨
化榆枌顯揚久益大聖世求忠臣

自砭

人有好勝心當以善勝惡宜宜執人我與彼較強弱所得無毫釐所失已山岳事過徒自悔駟馬追不却況臨衰暮年事猶資審度如人行遠道日暮將憩泊遵途益須慎勿令趣向錯逆境是吾師苦口多良藥宜止人難欺將為鬼所噓有病在速治姑以自砭灼

道傍柵

鱗鱗田邊柵意欲全嘉禾不念大道隳輪蹄苦難過還

來踐旁畝害稼良愈多願以樹柵心治道夷險坡行子
得坦途羈旅遠詆訶兀兀滿隴翠誰冒蹊田科

謝師厚寄同黃壻魯直唱和

忽得穰郊信脩然病魄醒懷賢心獨在感舊涕偏零南
斗占神劔西豪聚德星臥龍看復起失馬顧曾經冰玉
清相照芝蘭遠更馨微官應念我白首候戎亭

和江東運使韓子文見寄

歲寒君子意窮達見情均多謝江南信偏怜澤畔人明

珠驚照夜寒谷頻生春白首論交地須看管鮑親

留別洛中諸友

少孤多旅遊解縣幸吾里親友皆賢豪相逢有餘喜世事如浮雲離合寧暫止酒罷余其東幽蹤逐伊水

早行

夙駕冒輕寒身勞意自閒鳴雞起遙野殘月滿空山水落灘沙白林稀落葉殷東方上朝旭始免畏途難

寒食日泛舟

合友逢佳節，攜樽泛碧流。
溪風消酒力，烟樹入春愁。
羣鴨開波練，疎雲透月鉤。
平生懷古意，最美五湖遊。

和韓子文題王摩詰畫寒林

摩詰傳遺跡，家藏久自奇。
高人不復見，絕竅更誰師。
水石生寒煙，雲結雨遲筆。
端窮造化聊可敵，君詩

仲春寄二弟

春雁來時節，飛鳴各有行。
弟兄俱遠宦，秦楚久相望。
尊席惟他士，鶯花似故鄉。
何時理歸策，共醉潁湖旁。

零陵憶弟妹

感秋懷弟妹
憔悴客瀟湘
他日常星聚
衰年隔雁行
既
盲難引望
垂老易悲傷
安得如鴻鵠
高飛向汝傍

龍門行

皇圖經野臨中天
北有大河南陸渾
陸渾之下伊之源
直走關塞侵山根
此山不斷亘坤軸
逆為汝海波濤翻
忽焉天意有不測
臨開峽口流如吞
長波萬練卷空過
貫都會洛風塵奔
崖岬相欽疎天闕
此號鑿龍為禹門

石道盤紆入幽邃杉松隱映皆祗園下窺朝市但塵土
不與人世同囂喧天章閣老真相嗣詔委北陸嚴國藩
前騶驅弩聊盤桓憑高置酒臨巖軒是月嘉平臘將盡
春風料峭煙霾昏圭陰表日影漸正玉沙透水波先溫
杳杳端闈照宸極壯似殽函周輶輶超然宴覽動容歎
坐預國論慙冥煩乃知公旦卜洛意根本繫時亡與存
法宮在今宜有制上憲太微尊至尊垂杓布政朝萬玉
莫如洛宅當乾坤三陵氣象貫星野慶雲祚百雲來孫

豈能設險御諸夏亦以掃患安元元

和君實同年會宴

詩酒相娛誠得策洛社當年有牛白况公同榜三四君
從宦天涯久相隔一朝把酒對春風餘花紅白猶堪摘
不鄙賤生年輩晚招延亦預樽前客清歡盡日信忘形
醉舞狂歌不知拍

與王弱翁遊龍門

誰知造化擘巍峩千古伊流向此過四面長松擁香剎

兩崖蒼石束寒波身閒愈覺良朋貴詩拙翻羞好景多
宜向諸方縱蕭散明朝望洛下長坡

和象之石聲

誰向西山選翠琳中含太古杳然音昔逢虞帝來祥鳳
今與陶家伴素琴清越乍敲脩竹裏堅方真合哲人心
一鐫名姓將難朽千載知君道味深

寄辛化光

疎閒心蹟久相親一別江城兩見春身若孤鴻長慕侶

道非尺蠖敢求伸優游歲月空尸祿明潤溪山不著塵
樽酒從容皆勝景遲君來作席中賓

和韓侍中垂蘿祠

勝遊今屬相君家臺榭高開碧水涯森聳綠梧常映日
縈紆寒溜曲穿花藤牽柔蔓垂長帶竹引新萌走蟄蛇
下吏不歸我醉弁却愁歸汗繡茵車

和韓侍中上巳晚遊九曲池

前朝池閣盡塵埃登覽慚無弔古才舊物祇餘蒼石在

斷垣曾識翠輿來回環竹徑穿幽鳥寂寞茅簷覆故臺
遊客靜觀興廢迹利名心息若寒灰

和韓侍中春陰馬上

三月芳菲欲暮天可堪零雨晝連綿潤催隴麥將黃節
寒阻春蠶起早眠疎柳拂牆難結絮嫩苔鋪砌已成錢
牡丹只待晴陽照看吐新花一尺圓

和韓侍中登廣教院閣

兩陪千騎叩禪關每聽高吟解客顏吉甫壯猶方北伐

謝公高興在東山僧軒深閉芳菲靜春晝初長鳥雀閒
浮覽不知歸遲晚火城看逐隼旟還

和韓侍中初夏遊興慶池

池邊喜逐綵旗行初夏亭臺照水明筠籜乍開春後綠
林梢長帶雨來聲新荷獵獵香風遠深洞沈沈晝景清
珍重相君憂國意宴遊終亦念農耕

和王微之同持國泛舟登樓

故人還喜笑言同把酒相看似夢中老去卜隣逢晏子

從來解榻賴陳公
畫船穩泛平溪綠
層觀高橫落日紅
莫訝狂歌先盡醉
預愁羈旅向山東

臨汝溫泉

山前陰火煮靈源
昔日曾臨萬乘尊
歷盡興亡只如此
不隨時俗變寒溫

和呂獻可龍峰寺見寄

驅車日日望行舟
目斷風帆不可留
獨有台公遺愛地
蒼山萬疊滿晴樓

春日寄許州韓持國

湖上春遊阻重陪
朱轡紅旂想徘徊
鶯花對席應相惱
不見頻攜醉客來

雪中池上

碧玉為池白玉隈
千林萬木盡花開
攜賓欲覓開樽處
祇得清香辨野梅

和持國聽琵琶

須知絕藝好娛賓
能使知音作伯倫
累月應將管樂籍

恐公重作獨醒人

附喻汝礪

遊海雲山

渺渺天宇初便復有此山清辰及茲遊遐想百代前來
者幾何人當時各為歡淑質揚妙舞哀絲遞清彈樂事
坐如昨芳歲已屢殫向來所遊人落葉不復還迴然散
遠目感之為長歎竹林遙舊所鵲巢豈昔眠念誰當久
存而不往所緣破涕聊一怡山川却萋妍未知後世事

誰復當來旋

過府學遂謁文翁堂

綠荻負幽隱高槐泛輕涼各誇一時好披風互低昂詎
知五月中微陰颶催黃我行魯侯宮獨謁文翁堂若人
骨已朽道在斯不忘遂令蜀文章照耀日月傍世事俱
腐臭斯文真久長靡顏能幾時蕭條翳墟荒富貴豈不
好千載同一傷三歎過泮宮撫已涕自滂

清晚坐四天王院

杳杳天宇涼月墜星亦稀朝暉下簷隙遠色開林扉寂
坐無物後隱几或在斯曠焉耳目清擬覺形神歸混世
迹若近抱中心獨微故殿今幾年何人所摹規當時亦
姱我作者良已罷快意取一好于身亮何私不知壯觀
地徒使來者悲坐頃又成昔安知今是非

登正法宮塔

疎雨洗空濶高標拂青冥攜筇一來登長笑謝所撷清
香翔遠江丹氣舒翠岷雪嶺浮夏白海雲亦遠青孤花

要危芳初篁羅新榮手容五十里颺沓為我陳陵坻
潏變遷物狀幾屈信念往思自遠感來屢彌臻傷哉千里
心嗟爾百代人胡為軫其德戚戚勞所營吾請以此辭
歸來巖下耕

遊西臺院暑雪軒觀石鏡

城中苦伊鬱茲軒獨高褰連甍動參差錯畦橫阡眠雪
嶠正孤峙若與我周旋遠翠浮蕩漾輕鷗下聯軒密竹
冒幽逕新蒲澹清漣初遊愜餘懷既久幽念攢慨彼泉

下人灼灼夸令顏忽然墜榛莽窈窕不可援一鏡空復
情況乃塊石頑哀哉彼愚子婉孌情所牽差勝茂陵公
更詠方士言

遊巖真觀支機石而壁有記古鼎茅事

古木共幽意長廊亦晏如於焉詠逍遙且復散衣裾塵
慮颺已空道心頗閑舒不知度世人去此歲幾徂云何
有丹砂尚爾留庭隅支機亦悠哉誰復訂有無我知此
公意慨彼元鼎初繼之五鳳間斯民斃刀鋸聊欲謝世

網歟以道自娛抱獨理自會曠懷遺所拘初匪逃世人
而世自我疎含默念斯人起我憂患餘

謁諸葛廟

孤雲何其高明月不可繫灼灼抱此心與世自涇渭釋
未從所歡感亂亦獻歎谷惟今之人竊國未云恥七首
入吾市秋風動燕水區區袁與曹等是刺客耳而我于
其間秉義不敢墜哀音回衝飈清義動幽邃天心固難
亮吾獨信所履溶溶日間雲漠漠苔點砌饑飈墜蒼瓦

澹薄公所憩靜然想英姿孤懷亦差慰

謁江漬廟

坤軸東南傾大江日夜注前驅下洛洙餘濤畧吳楚任
勢不期勞得意緣所遇水也初無營神哉亮誰主芳蘭
沈清華碧藻舒翠縷晨鵲戲野岸春鳬集深渚均是得
所安而神豈私汝古來幾精魂拾此迷所處淫遊不知
還沙村失煙樹而我後千載悠然在江汭抱嗇貴無競
矜名忌多取冥冥罨岸風淫淫打船雨舞雪窺洪濤開

蘋渡前浦再拜謝神况聊復隨所住

子雲墨池

讀書豈不好憂憤還自茲書中見古人隱閔惻餘思遇
險理有激尋分意多隨娟娟感姱容戚戚念幽棲曾是
無間然孰馬愜所宜覽之不自聊悵然起遙悲不如撥
置之濁酒聊一持先生頗多事斯心昧前知亦復坐奇
字慘戚亡所歸

晚泛浣花遂宿草堂

扣橈泛澄虛濯流睇幽芳晚霽觀奇樹夕霏媚踈篁歸
鳥亦雙閒夜魄動初涼忽馬衆星微天高月舒光昔也
杜陵子澹然此茅堂客至酒自斟句得意已忘云何常
念饑零落在道旁古來技入神一飯豈所望吾輩天所
窮慨歌淚沾裳

遊琴臺

臯朔語顙俳上頗倡優之嚴吾數預事慘慄失所棲眷
言彼姝子深情結幽期浩露泛酒甕輕雲思琴徽撫絃

視八荒頗覺秦岫低紛紛漢諸子悟解良獨遲一朝不
自保頸血霑裳衣公豈不炯介慮禍蓋已微汚已迫前
識達生邁天倪濶哉昭曠情豈屑後代嗤

草堂詩

燦燦詩翁錦里西只緣詩好合窮栖竹鋪冷色雲連寺
柳漾晴絲鳥過溪凝怨不禁闌樹暗駐情應恨蜀山低
離人苦怕春歸盡可忍紅英半著泥

其二

閒把烟光次第陳
岷峨風物見精神
翻成錦繡千般樣
供與江山幾處春
深屋長河元老大
我眉曼綠却逡巡
從公乞取無邊手
免作詩中半箇人

其三

從交日日敞窗扉
嫌怕風光入眼遲
剩買芒屨供看竹
趁乘春雨去栽橙
苦無賓客僧來後
薄有生涯鶴下時
聞道隣翁酒初熟
新篘一酌莫相遺

其三

遠嶼曲洲縱復橫沙邊繁鳥弄簫笙一軒簷冷松陰合
十里林香藥草生路轉斷楂逢石坐風移深竹見僧行
晚來沖抱更清曠時有幽人帶月耕

其四

亂後飄零歇此身風光無賴更清新客懷易感酒添病
詩思苦慳花減春南枝北枝鶯舌巧前村後村雨脚勻
暫借溪邊老為客花心柳眼莫撩人

其五

朝元閣邊瑤草芳惟君之故遙相望人歸後雁關塞阻
思入南鳬離夢長懸知同心兩相憶賸欲共看千里光
金輿玉輦不復見腸斷華清雲樹蒼

其六

竹外清疎浸碧溪溪邊竹澹煙雨霏閒看雪嶺題詩罷
醉罷西郊信馬歸霄漢直愁雙闕迴夢魂長著五陵飛
故園秀木又春色只恐歸去池臺非

其七

錦官城西春草芳
杜陵客子憂思長
浴晴晚樹淡浮綠
卧水幽花深度香
交情憫憫言燕阻
舊國迤迤雲山蒼
白蘋洲渚落日晚
明邊正銜歸雁行

其八

浣花四月天氣和
綵舟翠旗樂莫過
離人千里起遙怨
緩棹一曲浮靈波
惠風曇曇泛衡杜
流望演演逾關河
終然有懷春復夏
歸去灞漈眠汀莎

石倉歷代詩選卷一百三十一

欽定四庫全書

石倉歷代詩選卷一百三十二上

明 曹學佺 編

宋詩九上

司馬光

昔別贈宋復古張景淳

昔別如飛蓬飄蕩隨所適
那知十六載卮酒對今夕
渺然思舊遊間不容一息
百年詎幾何會合難屢得
復古

君子人志行重金錫皎如百鍊精不為燥濕易景淳氣
乃道浩蕩誰與敵下筆驚雷霆龍蛇走屋壁居然器業
美但有富貴逼他時綰金印羈束愈愁寂須窮今日歡
快意浮大白勿辭簪弁傾頽然倒樽席

同錢君倚過梅聖俞

王畿天下樞簿領日填積自非奉朝請九衢未常識今
茲到東城胥靡斃逃役近指聖俞居安能不往覲一室
靜蕭然昏碑帖古壁叩階讀新詩迷闇得指擿笑言殊

未足黯然日將夕呼馬涉歸塗燈火已歷歷又知幾何時更有重來迹

邵不疑廳薜荔及竹

脩竹非俗物薜荔亦嘉草樹之君子庭人來見逾好侵
堦鶴脰細緣壁龍鱗老紛披兩疎翠煙色宜秋早主人
日封植清風庶長保

噴玉泉

蒼崖雙起秋雲齊亂峯迸出如攢犀石稜澀不容馬蹄

下馬步入荆榛蹊瀑泉沃雪拖白霓落潭橫引成清溪
老木長藤咫尺迷興闌欲出忘東西

神林谷

石下泉聲蔓草深石上露濃蒼蘚徧山禽驚起飛且鳴
葉墜空林人不見

八月十五日夜寄友人

故人音信絕對月動相思清露滴紅葉此懷當告誰秋
風廣陵郭正是望濤時

都下秋懷呈聶之美

愚疎強從仕趣尚與時乖
竭來遊京邑榮願知誰諧
王國富英奇氣象標巖崖
雲鴻送雙目攀援路可階
秋風轉枯葉颯颯繞寒齋
出門無所之飛塵滿天涯
夫君宦未達猶得稱吾儕
解衣換斗酒且盡平生懷

小雨

雲日互出沒數朝飛雨清
瞳矐似欲止庶纖還未晴
映空輕絲亂著物細珠明
葉端危未落荷心重忽傾
喜涼

高燕舞更濕羣蛙鳴于余亦有得藥畹胡麻生

八月十五日夜宿南園懷王君貺

昔公在洛師未嘗棄嘉節今宵秋半分空羨西園月天
色湛澄清風聲吟騷屑笑言不可親引領望金闕

秋意呈隣幾冲卿

新涼入閭巷舊暑何人掃筠籠賣紅蓮莎堦墜丹棗蕉
衫日以疎紈扇安能好蟬悲西風樹燕亂斜陽草此意
屬淵明籬邊幾樽倒

楚宮行

楚王宮中夜未央清歌祕舞會華堂
木蘭為柱桂為梁隨珠和璧爛同光
橫吹乍鳴秋竹裂繁絃初度春雨歇
九微火樹垂垂滅羅衣紛紛玉纓絕
滿朝冠劍東方明宮門未啟君朝醒
秦關日夜出奇兵武安君火照夷陵
夜意

清夜四無譁深嚴上帝家星翻珠網白
斗挂玉樓斜風靜虛成韻霜輕未作花
還疑漢津客浩蕩寄流槎

春塘冰

春塘含薄冰
淅瀝隱隈曲
晴日射寒芒
柔風折哀玉
草樹曾未知
波光已先綠

烟際鐘

蒼茫返照收
羃歷寒烟起
前山點同色
不辨峯巒美
獨有遠來鐘
悠揚翠微裏

漁洲火

漁翁繫葉舟
遠映楓林宿
手攜雙白魚
呼兒爨山竹
深

夜寂無人明滅寒江曲

寒溪石

穹石正嶄嵒寒流更清急霜飛敗葉擁波濺蒼苔濕谿
僧勿劇來沙鶴方孤立

幽谷泉

深谷窅無底空聞泉水哀時因秋日照微見碧縈回谷
裏非人境胡麻何處來

天外峯

飛鳥去不息長空黯何極
疎峯帶夕暉點綴秋水碧
禪觀坐超然相望兩沈寂

寄題傅欽之濟源別業

縣郭遙相望脩篁百畝餘
林間清濟水門外太行道
勝隨宜足身閒與世疎
何時容命駕采蕨釣肥魚

金山寺

香刹冠嵯峨松門掛薜蘿
風高塵不到岸濶鳥難過
欲雨江容怒新晴海氣多
停舟何所事回望隔烟波

寓泊鄭圃寄獻昌言舍人

旅食緇衣館飄蓬
恍自迷樹橫寒霧遠
山隱古原低
愁暮空庭雀驚晨別墅
雞故人何處在依約玉繩西

奉和始平公憶東平

相印東臨汶水陽
兩看春葉與秋霜
登山置酒延鄒湛
上馬回鞭問葛強
谿竹低垂寒滴翠
露荷相倚淨交香
宵衣深念長城固
肯得從容傲醉鄉

和運使舍人北園餞別行憩三交僧舍冒雪宿

百井關見寄

驪駒北上雪孱顏
鞭矢前驅度漢關
僧室松杉清照眼
驛亭煙火迴依山
馬銜邊草枯猶瘦
雁怯胡雲冷未還
賤子不須回首問
鬢毛蕭颯簿書間

和景仁西湖泛舟

滿船歌吹拂春灣
天外晴霞水底斑
誰信飛觴臨綺席
獨能回首望青山
東門車馬匆匆別
西洛風煙寂寂間
疊石溪頭應更好
祇輸野叟坐林間

和君貺宴張氏梅臺

京洛春何早，憑高種嶺梅。
紛披百株密，爛熳一朝開。
青女工黏綴，霜娥巧翦裁。
崑山雲滿谷，蓬渚浪成堆。
勢擁樽前合，香從席下來。
蜺旌壯天起，練甲洗兵回。
不使光風散，曾無夜色催。
人稠衣馥郁，地狹舞徘徊。
民服召公化，時推何遜才。
淹留文酒樂，璧月上瑤臺。

留別友生

墅際共為別，客亭芳草新。
何心更戀酌，滿目盡傷春。
今

古無窮路東西相背塵行行復回首不欲著鞭頻

和君貺清明與上巳日泛舟洛川十韻

繁華兩佳節邂逅適同時雅俗共為樂風光如有期
曉烟新里巷春服滿津涯已散漢宮燭仍浮洛水巵
占花分設席愛柳就張帷華轂爭門去輕簾夾路垂
一川雲錦爛四座玉山歌疊鼓傳遙吹輕橈破直漪
清談何裒裒和氣益熙熙相見周南俗當年播逸詩

寄唐州吳辨叔二兄

方城古稱險遠在豫州南近歲蒿萊闢新民秦晉參當
官誠近厚獲譴亦無慙但惜牆陰竹歸軒幾日驂

和宋復古小園書事

飽食復閒眠風清雨霽天葉深時墜果岸曲乍藏蓮波
面秋光淨林梢夕照鮮東家近亦富滿地布苔錢

閒居呈復古

閒居雖懶放未得便無營伐木添山色穿渠擘水聲經
霜收芋美帶雨接花成前日鄰翁至柴門掃葉迎

晚春病起呈擇之治臣

風日正和柔身輕喜病瘳懶拋殘蠹簡暖脫敝貂裘值
客開青眼逢花忘白頭家家好春色何處可同遊

和王安之題獨樂園

草濃初過雨林靜遠含烟鷺引新飛鷺荷承半墜蓮朋
來惟有月山見不須錢誰與同其樂壺中濁酒賢

酬宋叔達卜居洛城見寄

離羣四十一春風縱有相逢似夢中幸得遭逢作鄰舍

休嗟彼此是衰翁
漢文前席人將去
庾信誅茅橐未充
悵望金隄碧蕪濶
杖藜攜手幾時同

其夕宿獨樂園詰朝將歸賦詩

平曉何人汲井華
輓轡聲發散春鷗
開園更有四五日
映葉尚餘三兩花
宿病岑岑猶帶酒
無眠耿耿不禁茶
自嫌行樂妨年少
遽索籃輿且向家

和邵興宗秋夜學舍宿直

直舍逍遙度清夜
斲投逢掖解儒冠
高樓影背星河轉

疎竹氣兼風露寒籬下黃花新藥亂門邊碧柳舊株殘
折腰把板今無有勿似陶潛遂棄官

和吳仲卿病中偶書呈諸同舍光時亦卧疾

病來門不掃秋草翳吾廬棄置賢人酒蕭條長者車冥
迷牀闌蟻潤溽篋生魚藥物從無繼簞瓢自有餘形神
寂可弔身世邈相疎何事文園客消中亦著書

會不疑家席上紀實

名客客俱來賞花花正開寒暄方得所風雨詎相催席

上柳飛雪門前車隱雷
主人意仍厚安得不徘徊

酬安之謝光兄弟見過

平生一二日不見已相思
况復閉關久杳無攜手期
清談勝妙藥高韻敵涼颼
愧乏機雲美虛承青眼知

和子駿約遊一二園亭看花過雨而止

行樂及佳時官閒無所羈
只知花正發不共雨為期
淺草碧無際濃雲冷四垂
陪遊興未盡安得不相思

和邵堯夫年老逢春

年老逢春春莫咄朱顏不肯似春回酒因多病無心醉
花不解愁隨意開荒徑倦遊從碧草空庭慵掃自蒼苔
相如談笑猶能在坐待巾車陌上來

再和邵堯夫年老逢春

年老逢春猶解狂行歌南陌上東岡晴雲高鳥各自得
白日遊絲相與長草色無情盡眼綠花林多思襲人香
吾儕幸免簪裾累痛飲閒吟樂未央

和邵堯夫安樂窩中職事吟

靈臺無事日休休安樂從來不外求
細雨寒風宜獨坐
暖天佳景即閒遊
松篁亦足開青眼
桃李何妨插白頭
我以著書為職業
因君偷暇上高樓

酬邵堯夫見示安樂窩中吟

安樂窩中自在身
猶嫌名字落紅塵
醉吟終日不知老
經史滿堂誰道貧
長掩柴荆避寒暑
只將花卉記冬春
料非空處閒吟客
乃是清朝避世人

和子華招潞公暑飲

朱門近在府園東
杖屨過從跬步中
避暑連翩投轄宴
析醒瀟洒滿襟風
閒來高韻渾如鶴
醉裏朱顏忽變童
剪燭添香歡未極
但驚銅漏太匆匆

和伯常見寄

誅茅宋玉宅邊人
知醉宜城幾甕春
細雨短蓑漁向市
孤村極浦鼓迎神
徧遊七澤身忘倦
更賦千篇意轉新
不必滄浪美清泚
鄉來纓上已無塵

和留守相公九月八日與潞公宴趙令園有懷

去年與景仁秉國遊賞

今歲台星聚洛中
甘棠前後兩陰濃
英辭唱和詩千首
高宴遊陪祿萬鍾
木末霜繁花欲落
雲間字小鴈相從
西湖在望親朋遠
節物那堪處處逢

春日思景仁

去歲洛城中
嬉遊處處同
從離嶢嶺北
常夢潁泉東
草遶春街碧
花繁夕市紅
臨風默惆悵
想像白眉翁

送楊太祝忱知長洲縣

三吳佳縣首民物舊熙熙專用清談治非如俗吏為林
疎丹橘迴稻熟白芒歌宜使民無忘嚴修太伯祠

送趙書記衆之官華州

車馬出城外瀟瀟未有塵辭梁猶帶雪過洛漸生春幕
府斜依嶽關山四抱秦曩來弃繻者今日復何人

送華亭沈主簿

執袂青門道蕭蕭馬欲東暮雲零落翠遠樹淺深紅楚
澤吟聲裏吳山醉眼中相思杳何許野鶴唳高風

送何萬下第歸蜀

十上終無就才高定復論
清時守儒術白首在丘園
遠樹隱殘日孤煙生暮村
揚鞭萬里去幾許不銷魂

其二

失意流年老殘春對夕陽
可堪臨遠道更復舉離觴
花柳已蕭索雲山復渺茫
西風如有便音信勿相忘

送朱庶叔知濰州

東國連年水傷稼使君行部即為春
茫茫四野潢汙竭

鬱鬱萬行桑柘新俗不好奢田器貴獄無留繫吏家貧
齊人忽怨歸朝速自得承明侍從臣

送僧聰歸蜀

翠柏老精舍紅塵倦帝城千山一錫遠萬里片雲輕江
棧紆還直天星縱復橫猿應更喜還是故鄉聲

送史館任祠部顓河東轉運使

聞望簪紳舊恩華雨露重圖書周內史汾潯晉全封秀
發千尋壁寒生百鍊鋒歸時門有戟惜別更從容

送張寺丞覲知富順縣

漢家五尺道置吏撫南夷欲使文翁教兼令孟獲知盤
羞藟醬實歌雜竹枝辭取酒須勤醉鄉關不可思

送二同年使北

華纓下玉除天子寵匈奴雖復邊風陋猶知漢使殊夜
烽沈不舉秋柝寂無虞何必燕然刻蒼生肝腦塗

右呂濟叔

雲愁雪欲零四牡出郊坰古塞煙華紫寒沙日氣青金

門秘雞樹朱節耀龍庭幾夜天街北遙瞻漢使星

右李公業

送茹屯田孝標知無為軍

疊鼓鳴鐃迎候新軍牙牙倚淮津聊應衣繡過鄉曲
不作引章驚故人荻逆短芽淝水暖荷浮圓葉渼湖春
使君此去榮多少猶是當年書劍人

送王殿丞恪西京簽判

清白世風存王公復有孫挺生如玉樹湧論似淮源日

背嵩峯紫春添洛水喧幕中多勝友肯使負芳樽

送謝都官顗知光化軍

廐吏整車馬怱怱辦曉裝青綬出閭闔朱旆指滄浪野
店杏初發津亭柳已黃行行不可駐猶及勸耕桑

送劉觀察從廣知洺州

漢家英俊士袞袞出金閭久襲通侯籍新腰太守章畛
封連故趙廬井帶清漳春色迎鐃吹應忘道路長

送師道知長溪因歸覲省

羈旅帝城久逢人青眼稀聞君又當去使我益思歸佳
色隣鄉樹高堂望綠衣春流先自疾心出片帆飛

送皇甫寺丞穆知藍田縣

南山三輔劇百里古諸侯漫得絃歌趣不分宵旰憂煙
橫輞川暝雲照武關秋安得無羈束尋君一縱遊

送李尉以監丞致仕歸閩

行行歌式微浩歎返荆扉却著登山屐盡焚趨府衣溪
清魚影亂竹闇筍芽肥應悔浮名誤空將白髮歸

送李祠部

復圭字
審言

知滑州

東郡鯨隄古，歸來烟火疎。
提封百里遠，生齒萬家餘。
賢守車纔下，疲人意已舒。
行聞謠五袴，京廩滿郊墟。

送上雒王推官經臣

墨綬百里宰，紅蕖幕府僚。
民淳無鬪辯，地勝得逍遙。
日上雲未散，春深雪不消。
知音已交薦，勿茹紫芝苗。

送瀛州簽判蘇秘丞案

高陰十萬兵，幕府籍時英。
塞上風猶勁，關南春未生。
投

壺邊柝靜倚馬檄書成不忘塵中客征鴻可寄聲

送周寺丞畧知洛南

太華拍商於中間百里餘稍行山驛遠漸與世塵疎
楚塞參差接秦民錯雜居惜哉非肯綮不足試投虛

送章伯鎮知湖州

江外饒佳郡吳興天下稀萼羹紫絲滑鱸膾雪花肥
星斗寒相照烟波碧四圍柳侯還作牧草樹轉清輝

送王伯初通判婺州

煜爚屏星駕迢迢
嫫女區嵐光晴向背
溪溜暖紫紆萬室
鳴機杼千艘隘舶艫
若逢耆舊問能說
隱侯無

送張少卿學士子憲知洪州

相府典刑在朝閨
望實高袖書榮史觀
典樂重卿曹夷路
迎飛輶桑林應奏刀
家籛傳舊學廟鼎刻
前勞袵服屯千騎
連檣閱萬艘劍芒衝
夜氣閣影動秋濤
風色傳花信烟花拂
酒膏使君專問俗
無意在遊遨

送昭遠兄歸陝

種種親頭白帝城難少留倚門應有望列鼎本無求清
夜多歸夢紅塵厭久遊此行殊捧檄轅下五驂騑

送石昌言知宿州

煒煒離符守中流簇鼓旗柳陰濃不斷舟勢激如飛魏
闕行歸奏承明祗慙違星軺晨夜度尺素勿令稀

送程端明猷知成都

高陽將幕開濯錦使旌來欲識關頭雪正如江上梅宵
衣矜遠俗霞冕寄良才豈待三年最修梧茂帝臺

郭氏園送張仲通刺棣州

名園送嘉客冠蓋去傾朝
小雨塵微歛輕寒酒易消
鴈歸春近塞日上海生潮
北道平如掌東風五馬驕

送裴中舍士傑赴太原幕府

元戎台鼎舊大府節旄新
邊候正無事賓筵斯得人
山寒太行曉水碧晉祠春
乍釀葡萄熟飛觴不厭頻

送王書記

申字應辰

之官永興

白髮添新鑷紅塵滿敝衣
人生適未值吾道豈云非
羣

洛風烟遠函秦草樹微
長安春酒美行樂勿令稀

送李學士

及之字
公遠

使北

征蓋霜空迴飄飄迎塞鴻
羣牙侵海角漢節下天中
騎咽陰山雪裘寒易水風
邊聲不可聽歸思浩無窮

送魏寺丞廣赴辟秦州判官

征西大府開後乘得高才
區脫烽烟靜渠搜賊貢來隴
雲低玉帳羌舞奉金罍
信美從軍樂寧煩王粲哀

送周密學沆真定安撫使

玉帳前茅舉銅魚左契分平生公望著期月政聲聞陌
上壺漿溢潭邊花氣熏遙知待新將民物兩欣欣

送燕諫議知潭州

長沙地饒美賈誼獨傷悲自古臨榮辱幾人無怨容使
君擁符節大艦出江湄意氣陶然樂應無弔屈辭

送李益之侍郎致政歸廬山

益之好談禪
故效其語

儒業金章貴歸心白鶴孤江山依舊在軒冕歸來無嘯
詠誰當共登臨未索扶浩然知此樂迴與世人殊

送雷章秘丞知芮城

西伯昔斷訟名存迄今南臨大河曲北倚首陽岑俗
被聖賢化人多禮讓心夫君老經術終日想鳴琴

相國祁正獻杜公衍挽辭

每楫才猷大冰霜德操堅陶鈞成茂業書史樂高年瞻
望簪紳共吁嗟館舍捐舉時無異論方信令名全

其二

釣玉吳臺舊誅茅梁苑新位登華袞貴家似布衣貧直

道高當世清風遺後人千秋寒照目竹帛不棲塵

次韻和江鄰幾九月五日省直

羣騶布路散瘦馬解鞍迴雨闌蟲聲樂秋深菊意催圖
書紛自適僚友邈誰陪何以消寒夜殘醪不滿杯

寄題興州晁都官仲約東沼沼上有唐鄭都官

詩刻石

名郎遊勝地心跡繼風流昔為題詩著今因好事修四
山相照映五馬屢淹留相見波光淨依然一片秋

寄題字文中允之邵所居

孤宦行直道栖栖良可悲誰能拂衣去不待掛冠期
經史乃吾友雲山為已知世間青紫貴盡付兩佳兒

山中早春

山木欣欣意春光次第催歌中望歸鴈伏檻殷新雷
岩靜聞冰坼巢空喜燕來澗花從寂寞亦向草堂開

華清宮

新豐雞犬稀薊北馬秋肥金殿翠華去玉階紅葉飛
荒

林上路廢溫谷舊流微嗟此非人事何須問是非

秋日登觀信亭

西風連夜雨草樹已蕭條宿靄稍零落寒山更寂寥
林紅猶帶日岸白欲生潮新雁來何處離離天際遙

客思

客思倦漂泊居然感物華關頭望紅葉馬上見黃花
薄宦終無定閒愁詎有涯今朝書至否幾夕夢還家

觀僧室畫山水

畫精禪室冷方暑久徘徊不盡林端雪長青石上苔心
閒對岩岫目淨失塵埃坐久清風至疑從翠澗來

雪霽登普賢閣

積雪明朝日山河坐可分巖初解凍片段未歸雲直
望窮人境高尋俯鴈羣開門枝鳥散玉絮墜紛紛

松江

吳山黯黯江水清欲雨未雨傷交情扁舟蕩漾泊何處
紅蓼白蘋相映生

潮水

平江欲上潮古木自蕭蕭
兩岸饒葭葦寒波浸次寥

歸田

松菊陶潛宅蓬蒿仲蔚家
行遊筇杖瘦嘯傲幅巾斜
屋小疎茅覆門深亂柳遮
村童迎客至竹簾掃桃花

漢宮詞

苜蓿花猶短蒲萄葉未齊
更衣過柏谷走馬宿棠梨
逆旅聊懷壘田間共鬪雞
猶思飲雲露高舉出虹蜺

先春亭

園林近鈴閣旦夕被仁風自得芳菲早豈將疎遠同冰
開半塘綠雨借數枝紅會待韶光徧還應到野叢

塞上

節物正防秋關山落葉稠霜風壯金鼓霧氣濕貂裘未
得西羌滅終為大漢羞慙非班定遠棄筆取封侯

酹羹

軍廚重羊酪饗士舊風傳不數紫萸滑徒誇素鮑鮮瓠

蟲煩捫取勺藥助烹煎莫與吳兒說還令笑茂先

寄陝西提刑江學士

明主矜庶獄選才從本朝鄼侯三尺律漢使一封軺郡
國清名滿關河古意饒淒涼乘障客華髮日蕭蕭

和樂道自河外南轅過宜芳雨晴和氣景物可
愛馬上偶成

京洛春應老河邊初解顏碧浮煙際卉翠滴雨餘山目
極寒帷外詩成攬轡間滿川桃李色共喜傳車還

晨發故關寄逢吉

畫戟衣中趨絳帳
驛亭門外拂征鞍
已嗟漂泊三年別
更負從容十日歡
煖席未窮談笑樂
陟岡相望滯留難
揚鞭策馬幾多意
原上秋風作曉寒

次韻和仲卿中秋朧月

豈無錦幄翠簾垂
匝樹明燈正赫曦
共惜月華方滿夜
更當秋色中分時
烏皮几穩風侵鬢
白玉樓高冷透肌
千里浮雲何處斷
北來試問鴈應知

和始平公郡齋偶書

平安候火出雲間
區脫無塵刁斗閒
漢相威聲遙制敵
游兵遠迹夜開關
赤松雅意思輕舉
黃閣羣心望復還
玉帳牙旗空壯觀
謝公高興在東山

和江鄰幾金鈴菊

何處見佳菊
秋風汶水陽
酒浮金鐸細
露泛蜜房香
不謂紅塵地
相逢君子堂
依然故人意
寧減舊芬芳

寄清逸魏處士

鄉樹幾搖落臨風歌式微徒嗟俗緣重端使素心違茅閣杉松冷山園藥草肥不能如海燕歲歲一西飛

二月三十日與同舍宴李氏園晚歸馬上賦詩
門前蹀躞金羈滿座上連翩玉笋飛數尺遊絲留客醉
一行垂柳送人歸同邀勝友時難得再到名園花已稀
莫惜芳辰賸行樂無端風雨橫相違

和吳省副

中復字仲庶

梅花半開招憑由張司封飲

伯玉字

公達

帝鄉春色嶺頭梅高壓年華犯雪開正與嘉賓思共醉
不須芳物重相催從車貯酒傳呼出側弁簪花倒載迴
風雨難期王事劇未知休沐幾旬來

野菊

野菊未嘗種秋花何處來羞隨衆草沒故犯早霜開寒
蝶舞不去夜蛩吟更哀幽人自移席小摘泛青杯

秋夜

城上調秋角烟間發暝鐘風枝搖宿鳥霜草覆寒蛩久

負觀書樂端愁束帶恭覽因羣吏散還得遂幽慵

和范景仁聞蟬

春林滿巖綠誰信已鳴蟬葉上正多露山中別有天心
閒寧感物道合矧忘年坐聽生秋色何須膝上絃

六月十八日夜大暑

老柳蝸蟬噪荒庭熠燿流人情正苦暑物態已驚秋月
下濯寒水風前梳白頭如何夜半客束帶謁公侯

送雲卿知衛州

汗簡成新令寨帷刺劇州韋平家法在邵杜治聲優野
竹交淇水秋瓜蔓帝丘三年歸奉計肯顧石渠遊

送羅郎中登管勾玉局觀

官名為玉局已與俗塵疎鐘出寒松迴香疑古殿虛田
間非甚遠俸祿豈無餘誰道神仙樂仙家恐不如

石倉歷代詩選卷一百三十二上

欽定四庫全書

石倉歷代詩選卷一百三十二下

明 曹學佺 編

宋詩九下

余靖

遊韶石

世務常喧囂物外有真賞結友探勝槩放情諧素想韶
山南國鎮靈蹤傳自曩雙闕倚天秀一選尋雲上長江

遠縈帶衆巒疑負襁千里眇平視萬形羅怪象日影避
崑崙鰲頭冠方丈青螺佛髻高羣玉仙都敞霞城晴煜
燭桃溪春浩蕩仰攀霄漢近俯瞰神魂恍澗深流如織
巖虛動成響造化與真質妙畫胡能倣賤子生海隅逢
辰辱朝獎靡成彛鼎勲甘從丘壑往驚禽戀故林因驥
畏羈鞅茲遊得幽深同懷樂清曠世言帝有虞朔南聲
教廣丹冥卜巡幸翠葉臨蒼莽簫韶曾此奏鍾石無遺
像但覺薰風存蕭然天籟爽姬公著治典歷代所遵仗

九野莫山川萬靈咸肝鬢醫閭與吳嶽半列戎夷壤四時
迎氣祠猶煩禮官掌況乃祝融區羣物資含養來儀威
鳳居樂育菁莪長膚寸起成霖崇高一方仰躋之佐衡
霍無慙公侯享

南齋新植牡丹初冬忽開數朶愛玩不已因而
感咏呈知郡中舍

嶠南足暄候秋葉不凋霜孤根自北來繡纈忽葩張嗟
爾本國艷秀色含天香淑氣入春萼園苑生輝光豪家

走鈿車珠翠妍新粧貴門陳廣宴金碧開華堂惟恐風
雨至不羞歌舞狂意態占韶景衆媚曷能妨今茲植荒
圃空齋園短牆節物寒蟬後林木野梅傍胡為吐奇卉
特此昧溫涼祇知逢日暖豈測非春陽蜂蝶不爾採壞
欄啼夜蜚伊予久杜門荆榛三徑荒獨酌難成醉徒倚
徒徬徨憐爾守常性幽叢不改芳

遊大峒山詩

并序

予嘗恨遊觀山川皆前賢所稱圖籍所著者耳未能

索幽訪異與音馬迹之外得古人所遺絕境一寓
目焉因狀其名物與好事者傳之無窮也韶之境
富于山水而佛刹占勝相望于野其名聲洽于四
方者無幾頃閒居里舍與上饒從事子元王君擷
其遺槩得大峒焉始自州治水行七十里得月華
山捨舟楫肩籃輦道樵徑又十五里乃至是山觀
其旁礪聳峭秀倚天際絕頂之上千里在目日浮
月沈雷驚虹斷隨方下睨晦明異壑則雖丘垤衆

山蛟螭聚落不足喻其高也相與拂幽石翳脩林
澗聲泠泠清入毛骨真可遺世而絕俗豈獨攄憂賞
而已耶各為詩以誌之自漢武帝元鼎六年庚午歲
始平越為郡縣凡一千七十年至皇朝建隆元年
庚申歲始有僧建剎而居之又七十九年始為什方
院又二祀康定元年庚辰歲始有衣冠遊者豈天
作地藏有所待哉王君暨同遊本郡布衣李訪月
華山羅浮達二禪師咸書名于長老習公方丈壁云

十里松檜風萬仞斗峭壁陽崖雷自奔陰壑雪猶積勢
爭衡霍雄地控楚越扼胡為千載間名未光圖籍物乃
因人彰聞人于在昔不逢巢由高箕山亦頑碧我今共
遊覽逍遙非俗格劇論窮古今玄談叩虛寂攀蘿躡孤
峯和雲坐幽石濯纓清泠泉留為不朽迹

留題龍潭

峭嶺盤遠郊幽泉生石罅沮洳成深潭神龍隱其下氣
昏雲霧朝光寒風雨夜絕境隣梵宮餘波沃農稼秋態

月色澄晴蛟虹影射勢非蛟室卑名將鳳池亞存身此
蟠蟄得時扶造化何當歲大旱移湫救函夏

觀釣

麴塵寒浦波桂子秋空月烟濕釣綸輕雨濺苔磯滑健
鯉吞香釣錦文紅鱗鱗將為沸鼎遊勢窮猶煦沫稽顙
閒悵望江湖晴蕩漾奮鬣就其深族類能相忘胡為貪
一餌委身刀机上寄言洗耳翁逃名真可尚

和伯恭殿丞遊西蓉山寺

休澣約過從寧論隘與恭溪光染醺綠山色秀芙蓉忽
霽千絲雨齊張萬蓋松岫孤如欲適逕曲似相逢共快
雲霞志還尋麋鹿蹤麾披吳國紵杖拄蜀郊筇陰谷鳴
歸鶴靈湫起應龍跳梁窺葉狄縹緲入花蜂磴滑并蘿
躡巖幽半蘚封竹間泉繚繞煙外草蒙茸有語嫌雙燕
無虞羨大櫓歸來却回睇暮靄已重重

代贈

幽房寂寞時香散輕袿衣可憐夜永不成寐苦恨春殘

猶未歸歸來一見仲脩眉寶桂新聲逐調移多少相思
說不盡淚滿玉壺君自知

題白蓮庵

掩室昔宴居冥心遺萬化菡萏本無染紛華共高謝夜
禪杉月落晨齋庭鳥下林間雲氣浮池面秋香詫演法
辭故樓幽蹤賁寒野蠟屐此同遊願結宗雷社

寄題田侍制廣州西園

善政多脩舉增完池館清地含春氣早月映暮潮生石

有羣星象花多外國名與民同雉兔邀客醉蓬瀛積靄
藏樓閣馴鷗識旆旌甘棠留美蔭高倚越王城

寄題廣州田諫議頤堂

退食公堂暇應無俗慮侵簾開雙燕外吏散百花陰海
域逍遙境榮途澹泊心政成先養正惠愛及民深

送僧惠勤歸鄉

舊國起歸興三江一棹輕夜吟逢月白曉渡趁潮平楚
岸雲藏寺吳宮水繞城美師塵外去何日濯吾纓

雙松

自古詠連理多為陽艷吟誰知抱高節生處亦同心風
至應交響禽棲得並陰歲寒當共守霜雪漫相侵

新息道中遇雪

寒深雪壓春去去祇傷神巢穴有歸鳥路岐無住人遠
光天共白夜色月相親獨酌不成醉翻嫌名利身

送海琳遊南海

觸目盡塵累如師真不羣圓明水中月去住巔頭雲意

若乘風快名應過海聞脩然此高迹世網漫紛紛

留題龍光禪刹呈周長老

尋幽逢勝地方外趣無垠雙澗流寒月千峯鎖暮雲
路盤塵境斷世係祖燈分却愧留題處猶須說見聞

留題澄虛亭

湖光湛寒碧簾影拂莓苔魚戲應同樂鷗閒亦自來
雨餘輕靄合竹外雜花開久欲留詩去慚無綺靡才

靈樹喜長老屬疾見寄次韻酬之

鳴韶山下客多病似吾身每想彌天辯誰為問疾人泉
清偏照月松瘦不知春未遂尋高論遥遥一水濱

塞上

漢使重頒朔胡臣舊乞盟烽烟虛晝望刁斗絕雲驚虎
落雲空鎖龍堆月自明祁連山更北新築受降城

送李廷評知福清縣

世閥茂儒紳甌閩寵命新縣圖遙盡海鄉樹密藏春供
帳鶯聲老登車雉跡馴行聞趨召節舊美政如神

子規

一叫一春殘
聲聲萬古冤
疎烟明月樹
微雨落花村
易墮將乾淚
能傷欲斷魂
名韁慚自束
為爾憶家園

桂源早行

聞雞已行邁
策馬更徘徊
月色依山盡
秋聲帶雨來
自堪悲玉璞
誰復築金臺
薄宦空羈束
西齋長綠苔

山館

野館蕭條晚
憑軒對竹扉
樹藏秋色老
禽帶夕陽歸
遠

岫穿雲翠畝田得雨肥淵明誰送酒殘菊遶籬飛

曉至松門僧舍

日暮倦行役解鞍初息肩霧昏臨水寺風勁欲霜天
蓼浦初聞雁人家半在船思君正悵黃葉更翩翩

湘中送人

離謳方揭耳別緒已淒然草薳湘纍浦花殘蜀魄天
疑山晴拂漢啼竹冷澄煙後夜思君意空歌皓月篇

慧照大師

已向南宗悟尤于外學精士林傳字法僧國主詩盟初
地形容占彌天語論清因嗤支遁輩徒擅養鷹名

遊水南寺

雙刹聳浮雲層軒絕世塵松溪千蓋雨茶圃一旗春夜
梵龕燈暗朝香篆火新暫來猶永日堪羨白蓮人

暮春

草帶金鋪翠花房半墜紅農家榆莢雨江國鯉魚風堤
柳綿爭撲山櫻火共烘長安少年客不信有衰翁

宿山觀

孤枕秋宵永山寒夢不成殘燈背窗影急雨帶溪聲未
分山中老空思日下名區區如逆旅此際若為情

送岳師歸潁川

千里起歸思翛然物外身海山經處霧梅嶺到時春藥
更開新楮庭應長舊筠年衰重方術聊此送行人

題憩賢亭

虛亭遲嘉客登臨日相繼松篁夏吹寒煙霞暮江霽高

興山光遠急影波聲細區區榮利途扁舟暫時憩

山寺獨宿

柴車走縣封窮途秋耿耿急雨帶溪聲殘燈背窗影驅
馳下士身淒涼旅人景山寒夢不成愁多知夜永

送凌屯田知和州

粉署仙郎守一麾都門別岸柳依依定知春雨隨車到
且喜秋風破浪歸仁政便當聞虎渡歡聲猶在隔牛磯
儂今亦慙懷章請假道江鱸買正肥

謹吟五十六字攀送仲求殿丞之任贛川竊惟
嚴君國博掛冠歸閒而仲求兄弟為隣部守
倅其榮至矣誠欲賦述詞不逮意

一門纓組列西甌又見雙旌並訓農三釜親庭交祿養
夾河子舍接鄰封酒闌風雪催行色吟際江山助筆鋒
我亦思親求郡紱東湖南浦好過從

寄題宋職方翠樓

層樓幽趣稱登臨望遠憑高豁素襟
基酒等閒忘世慮

溪山最樂是家林，松聲帶雨千峯外。
潭影涵虛落照深，此景為君珍賞甚。
起予歸興欲抽簪。

謝蕭閣副惠茉莉花栽

素艷南方獨出羣，只應瓊樹是前身。
自緣香劇宜晨露，忽謂開遲怨晚春。
欄檻故將賓榻近，丹青重整畫圖新。
移根得地無華裔，從此飛觴不厭頻。

謝祖太博見訪西園

初聞結駟訪幽齋，拂曙呼童掃綠苔。
方愧蓬蒿開徑晚，

已驚騶馭過江來
林間載酒情偏厚
席上吟詩雨漫催
交態于今易離合
感君敦舊重徘徊

送劉學士知衡州

朱轡新命漢諸侯
地扼荆湘占上游
醴水聲侵古堞
祝融峯色入晴樓
晝垂三組鄉邦過
春擁雙旌嶽寺遊
番直星垣歸緩步
謫仙通籍著瀛洲

和胡學士館中庭樹

仙材封植九重深
苒苒何年別故林
曉色半籠青瑣闥

春光長在玉山岑，靜臨高閣翻清吹。
坐見羈禽息密陰，休羨井梧能待鳳。
凌霜堅守歲寒心。

送楊學士益州路轉運

芝函新命直仙蓬，又見岷山叱馭忠。
玉佩曉班辭日下，水牛秋粟轉褒中。
花時井邑蠶叢富，徼外人烟棧道通。
奇技刺文頻詔約，此行應更變民風。

思壽陽寓居高氏園亭

嘗借芳園石友家，幽棲無復羨紛華。
敞扉氣爽雲生棟，

卷箔香微露泣花桂向淮山分月魄桃從秦洞得仙葩
別來追想清閒境悔褫方巾走棧車

和邃卿張學士暑夕

危坐空齋暝色低三金才伏火將西煙濛細草流螢度
月上疎林倦鵲棲荃葛野棠交羽扇桔槔隣圃響蔬畦
中宵爽氣奪炎熱却笑班姬空慘悽

送舒太博通判眉州

通守方忻再命新東風疎雨拂行塵封疆遠入魚鳬國

岐路正逢蠶市春
彭岫曉嵐迎畫隼
錦江晴綠照朱輪
歸期不待更書至
舊有清名在縉紳

送鄧秘丞知德安縣

里閭偕遊心久降
越臺成政俗敦龐
香爐山下重為縣
閭闔風高迴渡江
且喜恩威長及物
莫嫌功業未經邦
公聲更近淵明宅
寄傲情應卧北窗

送張屯田通判益州

數載關中聞美名
可憐隨調却西征
天臺晚帳含香別

棧閣秋霖叱馭行杜曲尚逢樽酒樂回溪應望白雲生
相期勉力宣新政側耳民謠起少城

到寒後有懷青社詩今錄呈

初到營陵春始回泱泱風物接梧臺魚鹽利重通關盛
箏瑟聲和讌席開天際膚雲連岱色海中靈藥慕仙才
早知未許身閒去悔捨堯山石礪來

九日賞池會上訓王職方

雅集高談思豁然齊山依約對疎煙江城泛菊逢佳節

禁苑聞韶憶去年久厭風波驚世路且同樽酒醉涼天
今來古往情何異弄水亭邊艤畫船

和董職方見示初到番禺詩

五方殊俗古難并千載猶存故越城客聽潮雞迷早夜
人瞻颶母識陰晴波濤洶湧天邊濶犀象欄徧徼外生
太守不才當遠寄惟憂南畝廢農耕

落花

小園斜日照殘芳千里傷春意未忘金谷已空新步障

馬嵬徒見舊香囊
鶯來似結啼鶯怨
蝶散應知夢雨狂
清賞又成經歲別
却歌團扇寄迴腸

遊應聖宮

驅羸乘興出巖闌
雲構祠宮絕世塵
伴鶴不知龜甲子
斲山多見藥君臣
雨昏仙穴丹砂井
雲映樓居玉洞人
只待策勲書竹帛
抽簪來此作比隣

西山

萬壑千巖鬪物華
揜筇閒訪道生涯
一壇星斗脩真館

數里雲煙斲藥家魚戲竹溪寒影碎路穿松塢翠陰斜
桃源自有神仙宅未信明河八月槎

再簡伯恭

十載京華九日期帝家園苑醉金卮今朝郭外尋僧話
坐聽寒泉遶竹籬

端午日事

江上何人吊屈平但聞風俗彩舟輕空齋無事同兒戲
學繫朱絲辟五兵

羅浮有五色雀各被方色非時不見若士大夫
將遊是山則先日羣翔寺僧以是為候某庚
辰歲謫官來遊將至之夕茲雀亦集感之成
詠云

五方純色儼衣冠應是山靈寄羽翰多謝相逢殊俗眼
謫官猶作貴人看

寄襲長老

三徑荆榛盡力開千株桃李手新栽慙慙莫怪尋嘉樹

又喜春風過嶺來

感舊

醉吟曾共倚江樓
穠艷清香萬柄秋
蕩子醉歸時已暮
暮鴻驚散水悠悠

附何耕

青羊宮

一再官錦城咫尺望琳宮
未始得得來正望役役中
今朝弄晴雨策蹇隨春風
頗愛意象古停驂小從容
縹緲

百尺臺突起凌半空憑欄俯修竹決皆明孤鴻信哉神
仙宅不受塵垢蒙稽首五千言衆妙一以通靜觀萬物
復豈假九轉功區區立訓詁亦哂河上公癡人慕羽化
心外求鴻濛要騎白鶴背往訪青羊蹤

雲溪賦雙流郭信可隱居詩

幽居定何如頗恨未見之主人向我言喜色融雙眉脩
篁流翠陰寒溪漾清漪領畧非一狀幽妍發餘姿空濛
雨亦佳潏灑晴更奇豈惟二江獨意恐兩蜀稀主人信

妙士得此固所宜天公閔好景授受各有時豈無多田
翁偃蹇逝莫隨素交懷老蒲秀句紛珠璣安得招歸來
為君賦清詩往者不可作後生欲何為

龍淵

門前大江何渺漫昔人飲牛水為乾水乾龍逝亦其理
近在咫尺聊泥蟠魚蝦玩侮獐獺笑縱有靈怪誰當看
德人問舍壓吾境便爾築室相遮欄坐令異類皆屏伏
恃有此耳差少安却紆朱紱去監郡遣我守舍良獨難

昨來過門恍如夢龍致此語催歸鞍先生不信反不笑
謂我饒舌狂豐干

虛舟

君不見江臯車馬紛相送巨觚戢戢船載重西南使者
解官歸水淺著沙牽不動如君材具豈多得合侍明光
參法從胡為淺瀨著虛舟頗肖胸中太空洞問君此意
竟安在欲說向人誰與共山林鐘鼎本同轍繫岸截江
隨所用八窗窗窗淨無塵一水泠泠清可弄何當抱被

過君眠分破江天幽夜夢

題龍華佛閣

西川鑿山三大像突兀皆在江之濶修覺九頂見畧盡
獨此恨未瞻容儀竭來勝地了疇昔輕軒瘦馬相追隨
百尺金軀信雄傑三乘寶閣何瑰奇燃犀不用照幽鬼擊
鼓自合趨馮夷前人開創願力廣下與舟楫扶傾危六
月灘濤劇奔吼一分性命爭毫釐篙工落膽行者泣彈
指乞活天人師人心狎水水多禍佛力在人人不知慈

悲但作布施想江神雖怒將何為

普通山距府東十數里青州禪師洪杲道場也
自龍華歸過之棟宇頽落僧徒鄙野良為可
惜是夜雨大作因書所聞所見為長韻

錦城之東山培塿突起伽藍壓山口入門氣象頗不凡
在昔規模定非苟黃絹碑詞著眼看青州老衲知名久
自披榛徑結茅屋不剪霜華散蓬首市門有女奉巾盥
衣械無花生穢垢至今一轉鵲鵲語散作諸方師子吼

祖燈寂寞何人繼
宰堵岩堯惟鬼
守法席草長深
沒膝僧榻屋穿
光見斗似聞占
籍多衍沃合選
名緇振頹朽我
來不覺三歎息
眼底盡空諸所
有自開麤席掃
塵空聊寄閒眠
憩奔走夢回中
夜雨鳴簷臥聽
東風寒入牖明
朝散步轉山脊
好語相呼聞野
叟抽芒已見麥
翻浪搗炒懸知
香滿手須臾日
影散林樾絢練
春光被花柳僕
夫催歸屢不應
景物殊佳寧忍
負出山騎馬更
躊躇乘暇應須
重載酒

忘機臺

太虛生微雲機事日夕繁
兼忘豈不佳尚有忘者存
稽首老龐翁妙處希一言
請觀臺上月萬古無昭昏

和光亭

枯木倚寒巖三冬無暖氣
達人定汝笑胸中太涇渭
不妨聲色海徑造佛祖地
所以亦樂翁花前時一醉

自合江亭過渡觀趙穆仲園亭

喚舟芳草渡繫馬綠楊陰
步入莓苔徑門開花竹林
王

孫隨蝶遠嫠女隱雲深想見西南望悠悠空賞心

春日五首

聞道西樓下香風颺綺羅無錢沽酒得不醉奈愁何老去春緣薄慵來睡興多閉門終一枕亦不夢南柯

寂寞城南寺三年寄索居折花脩佛供持鉢乞僧餘竟日無車騎依時認鼓魚九衢塵一尺吾自有華胥

門前無俗物城上亦奇觀花浪東流穩雲山西望寒身凌塵外遠目極意中寬最愛風標客晴沙里素翰

萬里橋邊水朝宗去入吳袞衣新歷數神筭舊規模四
海從心正諸公著力無際天東望眼渺渺但平蕪
唇齒輔車勢坤維井絡方只宜花柳盛莫遣烏魚忙隴
麥無由食邊籌足可防出言還有禁忍淚不成行

題龍華山寺

傑閣山為佛精廬地布金水涵空濶淨路繞翠微深鳥
下窺齋鉢龍歸識梵音城中塵眯目那得此幽尋

浮翠橋

隔溪蒼翠各西東，架竹爲梁路始通。
缺月罅林凝淨綠，斷霞明水抹殘紅。
芒屨步步幽深處，藜杖聲聲屈曲中。
回首忽驚橋已遠，冷然身御圓田風。

寒碧亭

憑欄日日俯清湍，洗竹年年斬惡竿。
十頃瑤璃秋色靜，一林筴籟曉聲寒。
涼風有意生天末，明月無邊照水端。
誰謂過清難久處，愚溪元自不相安。

遠色閣

小小樓居著散仙
淵明真趣本幽然
招呼雲月欄干曲
顧揖江山拄杖前
獨鳥倦歸翻落日
誰家晨爨起疎煙
根塵應接無留礙
笑殺胡僧面壁禪

龍華大像蓋冀國夫人所作因成兩絕

慧性元從戒定薰
百花潭水洗僧裙
箇中力量真超絕
故老尚傳娘子軍

生男箇箇欲如狼
婦女軍中氣不揚
試問爭功嗔目士
幾人能敵浣花娘

假山

空庭幻出小嶙峋
假外應須別有真
只恐話頭成兩極
若為融攝主和賓

蓮塘

色香無比出西方
何物妖狐號六郎
手折一枝聊供佛
前身定是老柴桑

蘭坡

蘭與高人臭味同
含薰聊復待清風
紛紛蕭艾母相笑

爾輩敷榮轉眼空

段文昌讀書臺兩絕

段公曾此讀書讀破應須萬卷餘家禮一傳為雜俎
稗官收拾附虞初

隴麥漸漸滿意青只憂春早起蟲螟當年人誦禱而雨
合向茲山試乞靈

附楊甲

出東郭見山

二年不見山見之喜不休舉手三揖之山遠不領頭疑
我墜塵土已與俗同儔稍稍望雲脚下見八九丘近前
與之笑顏色漸和柔迎我以松風與我相獻酬憐我不
識路導以溪水流豈其終愛予為此世所仇一官最下
策包裹辱與羞百年在平地亦有一日憂誰能無饑渴
往與青山謀

合江泛舟

莫踏街頭塵寧飲城東水江頭放船去葦間問漁子岸

深魚有家鳬雁在中
汀得酒可以歌得樹
可以樣年年
舟中客顏色不相似
風波無前期遊者亦
如此短篙醉
時策遠出卧後几老
我不奈醒日落西風
起

遊長松寺宿石門僧舍得露宇

疾風吹輕衣駕我雲
脊路人間一回首驚
絕不敢顧鳥
投虛無底渺渺不知
處蜂窠蟻丘垤與世
同所驚試看
一蒼莽誰有不平慮
尚憐野僧屋佛面荒
苔蠹斷崖劃
呀吻洶洶崩石怒我
來得奇觀拄杖叩巖
樹青山有驕

色斯客不能句平生二三子慰我一相遇娟娟松間月
幽夕亦可度夜闌更小語風逼遺響去酌君無多酒繼
以木蘭露

宿安靜觀

青山轉龍脊矯首西南天上有仙人祠臺殿飛後前下
見雲雨興樹色暗平川仙人兩黃鵠乍去無歸年向來
道上履人著幾何錢一朝聞羽化悵望空流涎却揮囊
中金瓦礫來投捐巖巖化金碧香火通雲煙人間萬事

爾旦暮有愚賢而況爭奪場轉手分媼妍仙人一回首
破隴與荒阡紛紛不足道哀此區中緣石泉瀉幽潔意
寂不肯喧夜聞松風露起坐心寥然

與客遊滄浪亭得一字

霧回林蒼黃漲落水寒碧西郊好風景曉霽千里色相
從二三子掃灑溪上石主人信愛客沽酒炊玉粒揮觴
一再行弄此竹間日跳波醉中舞野唱寒外急牛羊歸
匆匆鳬雁來一一頽然寄天放不受世褊迫永懷堂中

翁回首千歲跡豈無獨往願乃為饑凍逼霜空洞庭野
天濶雲夢澤欲窮扶桑枝尚掛滄海席何當從茲去旦
暮生羽翼

靈泉道中

荒雞不知林落日鳴鴉背山行曲折盡稍出喬木外前
峯近相向秃缺不可蓋石泉微斷續渚澤亦多派牛羊
深墟落稚子翳蓬艾稻秧碧剌剌遮隴無疆界今年田
大喜飽飯我亦快猶慚食無功舉箸再三餽何當磨腰

錄助爾艾稊稗

寒食遊學射山

疾風吹沙天茫茫日落未落原野黃山空無人不碌碌
路長馬饑石齧足荒臺古林翳雲族何人剜嵒縛層屋
當時萬騎填山谷至今拾寶多遺鏃故國山川愁遠目
人世悲歡風雨速凌高舉酒天為蹙手攀嵒樹叩雲木
何人唱我淒涼曲興亡一眼冥冥綠野水平蕪飛雁驚

臘日遊梅龍得樹字

年年看梅水西路白頭溪翁眼如故重來攀髯老不死
我亦風埃憶歸去酒酣百怪入我腸夜半恍惚與龍遇
醉騎一尾天上歸陳迹江頭不知處梅花勸汝一盃酒
千歲寒凝真旦暮欲將老大傲風雪穴蟻窠蟲已無數
成都萬事更奇古石笋猶疑卿相墓孔明廟前柏千尺
神物脩脩泣幽樹它時滅壞亦同歸人生誰能一長顧

庚寅再遊

霜頭馬郊鞭影西欲尋遠梅無舊蹊但聞草木皆有香

未到已識花前溪
艤舟登岸入梅處
竹樹煙火茅茨低
百年死樹蟲蘚暗
鱗甲漠漠僵橫霓
老翁鼻祖頭雪白
下見兒女方勝筭
數株無力已仆地
強起放春花滿畦
瘦龍夭矯欲仙去
脊尾一半埋沙泥
雷公幾時獵幽蟄
夜半刀斧來剗野
人往往多再拜
疑有鬼物憑其栖
問樵訪牧不知歲
韶醜已見今老倪
故人同遊六七輩
或似醉阮林中嵇
遠樹覓花不識路
東邊犬吠西號雞
槥中但有酒清濁
寒具野擔勤提攜
誰言猶是蜀梅苑
破

丘斷隴山高藝種花滿地作癡計隨手變化空塵堅只
餘老樹香不滅力戰風雨猶堅屏何時江村一曲路與
子共賦歸來兮

靈泉山中五首

小縣相籠合濛濛數百家果蔬爭晚市樵牧亂晴沙落
日平江迥青山細路賒偶居無事在隨意問桑麻
野邑山圍盡風煙更可憐客情牛鐸外農事藕花前聚
汲松根井寬愁石底泉寧須計升斗詩興亦超然

勝地仙靈宅微官也謫居焚香他日夢隱几向來書小
睡便山雨長齋稱野蔬逢人問無恙滿意說樵漁
日下溪林薄芊芊肅晚暉閉門成石隱小水亦生肥醉
著溪藤杖歸來木葉衣狂歌有虎兕吾道只應非
何處長松寺雨花雲外臺山從百曲轉路入九關回老
檜成龍盡殘柯借鶴來人間斤斧亂風壑夜聲哀

靈泉山上晚望

野曠樹還亂林深煙更微天隨殘日盡雲掣斷山飛玉

壘風煙濶秦城草木非憑高無限事今夜客裳衣

又

遠目昏難盡青山濶展圍眼花隨處亂雲樹一時飛秋
至客愁遠路難心事違更憐人北望不見雁南飛

登待鶴亭

橫峯亂嶺如奔蛇前者欲起後驅呵危亭獨立一回首
天罅雲隙皆收羅手攀落日意不盡目送孤鴻愁更多
愁風衣裳客未冷我欲飲酒君當何

石倉歷代詩選卷一百三十二下